

JOB

Owanaa Yasinonkaa-waitaka Job

1 ¹Tzimatsi anta Kaminaa-winiki aparoni atziri ipaita Job. Kamiitha-siri ikantaka yoka atziri, tampatzika-siriri inaki, pinkatha iwiri Pawa, iwinkani iwiro kaaripirori. ²Tzimatsi ikaratzi 7 itomi, mawa irisinto. ³Iriipirori inatzi yoka atziri yanairi ikaratzi nampitajiitaroni isitowa-piin-tzira ooryaatsiri. Itzimi-motziri oshiki ipira-payi, oshiki aajatzi impira-tanipayi.^a ⁴Tima yaakowin-takaro iwawaijitanitomipayi iwankoki, itanakaro aparoni itomi, pasini kitaitiri pasini itomi, imatakiro maaroni itomi. Ikaimakaan-tziro mawa iritsiro akyootiri yoimosirinkajiiitani, irawaitaiyini aajatzi. ⁵Ikanta imonkara-takiro yoimosirinka-waita ikarajiitaiyakini, ikaimiri Job itomi-payi, iwitsikasiri-takaa-yityaari. Kapichikitaiti ipiriinta. Kachaaryiinka ikanta ipomiwin-tziri itomi, itanakari aparoni, imatakiri pasini, ari ikantziri maaroni tsika ikarataiyini. Tima ikanta-siri-tatzii Job: “Aamaasityaa kaaripirotaki notomi-payi, ikisima-waitakiri Pawa.” Aritaki ikantapiintatziiro Job.

6 Okanta apaata ijajiitakini maninkari-payi inkimiri Pawa opaitarika inkantiriri, ari imatzitakaro Mishatantaniri ijataki irirori. ⁷Isampitawakiri Pawa yoka Mishatantaniri, ikantziri: “¿Tsikama piponaana-karoka?” Ikantzi Mishatantaniri: “Nopoñaakaro anta nokinakina-waitzi naniitziro maaroni kipatsi.” ⁸Ikantzi Pawa: “¿Piñaakirima nompira-tani Job? Tikatsi osiyaari-ní irirori anta kipatsiki, kamiitha-siri inatzi yoka notomiyaayi, tampatzika-siriri ikantaka, pinkatha iwana naaka, iwinkani iwiro kaaripirori.” ⁹Yakanaki Mishatantaniri, ikantzi: “¡Jhí! ¿Pisiyakaan-tzima, ipinkatha-waitasitami Job?” ¹⁰¿Tima piñiilo oshiki paamaakowin-takari irirori, aajatzi ikaratzi saika-wanko-tziriri, maaroni tzimimo-tziriri? Pitasonka-wintakiniri maaroni yantawairi, irootaki oshikitan-takari otzimi-motziri opaiyita-rika anta kipatsi-kinta. ¹¹Intsityaa pakotasitiri iroñaaka, paapithatiri okaratzitzi tzimimo-takiriri, aritaki piñaakiri

^a **1.3** oshiki ipira-payi = 7,000 oisha, 3,000 camello, 500 apiti-payi bueyes, 500 imorani

inkisima-waitanakimi awiroka.”¹² Ikantzi Pawa: “Piñaakiro awiroka okaratz i zimimo-takiriri, intsityaa pimatiro okaratz pikowakiri awiroka. Airomaita pantziri iwathaki irirori.” Piyanaka Mishatantaniri ikinkitha-waitakairi Pawa.

¹³ Ikanta isaikajiitzi itomi-payi Job itsipayi-taro iritsiro iwawaijiita, irawaitaiyini imiri iwankoki yantariti iririntzi.^b ¹⁴ Ari yaritapaakari kamanti-rini Job tsika isaiki irirori, ikantapaa-kiri: “Nosaika-minthaitzi owaantsiki noshiwa-takairi kipatsi pivacati, ari iwawaijiita aajatzi pimorani-payi okaakiini.”^c ¹⁵ Ari imapoka-sitapaaka yarii-jiitapaakan kosintzipayi, ithonka iwapaakiri pimpira-tanipayi, yaanakiri maaroni pipira-payi. Apatziro nosiyanaka naaka namimiro iroka ñaantsi.”^d ¹⁶ Tikiraminta inthonkiroota ikinkitha-waiti siyainchari ikamantantzi, ariitapaaka pasini, ikantapaa-kiri: “Ayiitaki ookatha-rontsi, othonka otaapaakiri pipira-payi aajatzi ikaratz aamaakowin-tariri, othonkakiri owamaakiri maaroni. Apatziro nosiyaka naaka namimiro iroka ñaantsi.”^e ¹⁷ Tikiraata inthonkiro inkinkitha-waiti siyainchari ikamantantzi, ariitapaaka pasini, ikantapaa-kiri: “Ipokajiitaki mawa ipiyo-tani Kiyamori-wini-satzi, iwayiri-tapaa-kina, ithonka yaanakiri ikyakoi-tari pipira-payi, iwamaana-kiri ikaratz aamaakowin-tariri iwisayi-tapaakiri. Apatziro nosiyaka naaka namimiro iroka ñaantsi.”^f ¹⁸ Aikiro ikinkitha-waitatzii siyainchari ikamantantzi, ariitapaaka pasini, ikantapaa-kiri: “Isaikajiitzini pitomi-payi itsipayi-taro iritsiro iwawaijiita, irawai-jiitzi imiri iwankoki pantariti pitomi.”¹⁹ Ari omapoka-sitaka antaro tamptyaa okinapaa-kiro otzisi-masiki, othonka oshiwatapaa-kiro pankotsi, osintaryaana-kiro, anawyaakiri maaroni pitomipayi, kamaki. Apatziro nosiyaka naaka namimiro iroka ñaantsi.”

²⁰ Katziyanaka Job, isaraa-nakiro iithaari okatsi-tzimo-niintana-kiri, yamiitana-kiro iisi. Ipoñaa ityirowa-naka kipatsi, amananaki,²¹ ikantzi:

“Kaanki-miriki nokanta iwaiyantakina asitanari,
Sapoka-miriki nonkantajyaa aajatzi nompiyajiro anta.
Iriitaki Pawa opakinarori, irijatzi Pawa aapitha-tajinarori.
¡Kimosiri inkanta-wintaityaaro iwairo Pawa!

²² Okantawitaka awishimotakari maaroni iroka-payi, ti inkaaripiro-waitanaki Job, ti iñaawaiti aparoni ñaantsi kowiinka-tatsiri inkisimatiri Pawa.

Aikiro imapirotatyaa Job

2 ¹Okanta pasini kitaitiri yapiitakiro ijajiitzini maninkari-payi inkimiri Pawa opaita inkantiriri, ari imatzitanaaro aajatzi Mishatantaniri ijataki

^b **1.13,18** imiri = vino ^c **1.14** pivacati = bueyes ^d **1.15** kosintzipayi = sabeos

^e **1.16** pipira-payi = oisha. ookatha-rontsi = iwaamariti Pawa opoñaakaro inkitiki.

^f **1.17** ikyakoi-tari pipira-payi = camello

irirori inkimiri Pawa inkantiriri. ²Ikantawa-jiri Pawa yoka Mishatantaniri: “¿Tsikama piponaana-jaroka?” Ikantzi Mishatantaniri: “Nopoñajaro anta nokinakina-waitzi naniitziro maaroni kipatsi.” ³Ikantziri Pawa yoka Mishatantaniri: “¿Piñaakirma nompira-tani Job? Tikatsi siyaari-ni irirori anta kipatsiki, kamiitha-siri inatz yoka notomiyaa, tampatzika-siriri ikantaka, pinkatha iwana, iwankani iwiro kaaripirori, aamawinta ikanta ti ininti iyaaripiro-tanti. Ainiromaita ikamiitha-siritzi, okantawitaka pinintakaa-witakana awiroka nosinitimiri pinkaaripiro-takairimi.”

⁴Yakanaki Mishatantaniri, ikantzi: “Airorika yantaisiniri iwathaki aparoni atziri, apatziro onimowaitiri. Tima kantacha isinitiro aparoni atziri maaroni tzimimo-tziriri iwawisaako-tantyaarori yañaan-tari airo ikamanta. ⁵Intsyaa pantiniri itonki-payi aajatzti iwatha. Ari piñaakiri inkisima-waitanakimi awiroka.” ⁶Ikantzi Pawa: “Piñaakiri awiroka pimatiri tsika okanta pikowakiri. Airomaita pantsitiniri yañaa-mintoki.”

⁷Piyanaka mishatantaniri ikinkitha-witakairi Pawa, ikantakaa-karo omatiri kowiinka-piro-tatsiri mantsiya-rintsi, ithonka ipathaa-waitanaki iwathaki itanakaro iitziki irojazzi ipatziiotki. ⁸Jataki Job kaarasi-masiki, saikawaitaki samampoki. Yaaki kowitzishitaki, irootaki ikaintantari iwathaki.

⁹Okantakiri iina: “¿Irojatzima pikantziro pikamiiitha-siritzi? ¡Pinkisimatiri Pawa, pinkami!” ¹⁰Ikantanaki irirori: “¡Kooyá! Pisiya-kotakaro piñaawaitaki aparoni kooya kaari iyowai-matsi-tatsini. ¿Tima ipairo Pawa okaratzi kamiitha-tzimo-tairi, airoma ipairo aajatzti okaratzi kowiinka-tzimo-yitai-ni?” Okantawitaka awishimotakiri Job maaroni iroka-payi, ti inkaaripiro-waiti, ti iñaawaiti aparoni ñaantsi kowiinka-tatsiri.

Imishawaitaki Job

3 ¹Ikanta iñaakiro Job okaratzi awishimo-yitakiriri, tira imairitanaji, ñaawaitanaki imishatziro kitaitiri itziman-takari pairani. ²Iñaawaitanaki sintsii, ikantanaki:

¹¹ ¿Paitama kaari ookantana pairani asitanari ainiro omotyaatana?
¿Paitama kaari nokaman-tapaaka owakira notzimapaaki?

Iyotzi Job añaatsi Owawisaakotairiri

19 ²⁵Iro kantacha, noyotzi naaka añaatsi Owawisaakotaanari.
Iriitaki kisakowin-tajyaana-ni apaata aka kipatsiki.

²⁶ Onkanta-witakyaa omparyaa-pithayiti iroka nomisina,
Aritaki noñaajiri Pawa koñaaroini nowathaki.

Aikiro iñaawaitanakitzii Job

27 ¹Aikiro iñaawai-tanakitzii Job, ikantanaki:
⁶ “Nasi nowiro nokamiiitha-siritzi, tikatsi ookakai-naro-ni,
Noyotzi naaka, ti ontzimi kaaripirori nantzimo-tantiri inkantakoitinari.”

Isiyakaaminthaitzi Job oshiki inkimosiriwaiti

30 ²⁶Nosiyakaa-minthai-tzi oshiki nonkimo-siri-waiti, opokimo-tasi-takana kaaripirori.

Noyaako-minthai-tziro nonkitainka-takoti, opokimo-tasi-takana tsitinkiri.

²⁷Ti onkarati oimiraa-siritana,

Tima oshiki kitaitiri nonkimaantsiwaityaa.

²⁸Owasiri nokantaka, ti noñaajiri ooryaatsiri,

Nokatziyaka yapato-tapiinta ashininka-payi, nokowako-witakari inisironkatina.

Tsikama inkantinaka Pawa

31 ²¿Tsikama inkantinaka Pawa Inkiti-satzi?

¿Paitama yantzimo-tinari Sintsi-pirori poñaachari jinoki?

³¿Tima iwasankitairi irirori antzirori kowiinkari?

¿Tima iwasinonkairi antzirori kaaripirori?

⁴¿Tima iyotziro Pawa okaratzi nantziri?

¿Tima iñiiro okaratzi naatzika-yitzi tsika-rikapayi naniitzi?

⁵“¿Nokinkisiritama naaka nonthaiya-waityaa?

¿Nosiyatyamaa nojayiti namatawi-tanti?”

⁶¡Yajina Pawa imonkarata-mintoki,

Irootaki tampatzika-tatsiri omonkaratantzi, otinatziro okaratzi nantziri kamiitha-tatsiri!

Yakaitakiri Job

38 ¹Ari yakanakiri Pawa yoka Job isaikantakaro tampyaa, ikantziri:

⁴“¿Tsikama pisairika awiroka owakira nowitsikan-taka-rori kipatsi?

¡Pakina, omaapiro-rika piyotanita!

⁵¿Kaarima naaka nintaintsi tsika owiraa-thapi-yityaa kipatsi?

¿Kaarima naaka monkara-tantakarori siwitha iroka kipatsi?

⁶¿Kaarima naaka kisotakaa-kirori kipatsi nowitsikan-taka-rori?

¿Osiyawai-takaro nowakiromi mapipayi onampinaki pankotsi onkisotan-tyaari?

⁷Tima irootaki nantakiri pairani nowitsikan-taka-rori iroka kipatsi,

yakiwainka-jiitara ipanthaa-jiitzi kitaitakori impokiropayi,

Tima kimosiri ikantajiita yokaiti imaninkariti Pawa.

Iyotanaki Job yotaniri inatzi Pawa

42 ¹Yakanaki Job ikantana-kiri Pawa:

²Noyotzimi naaka pithonkiro pantayitziro maaroni,

Noyotzimi awiroka asitarori maaroni kinkisiryantsi.

- ³ ¿Tsikama nopalitaka naaka, airo otzimi-motantana noyotani,
nonkiso-siri-wintantyaarori piyomita-a-nari?
Noñaawai-tasi-waitaka naaka, titzimaita nonkima-thatiro
noñaawai-tziri,
Tima omapokakina ti noñaapiintiro naaka awisi-mota-kinari, oshiki
okompi-tzimo-takana.
- ⁴ Pinkimi, nonintzi noñaanatimi.
Pakina onkarati nosampi-timiri.
- ⁵ Apatziro nokima-sitami piñaawaitzi, ti noñaa-maityaami,
Irooma iroñaaka noñaakimi, naminakimi koñaaroini.
- ⁶ Irootaki nokisa-siryaawaitan-takari naaka,
Noñiilo nosaika-waimatsitaki samampoki, aajatzi kaarasi-masiki
iñaantai-tyaanari nowashaan-tajiro noñaawai-tasi-waitakari.

Itasonkawintairi Pawa yoka Job

¹⁰ Ikanta yamana-kotairi Job itsipamintha-tanipayi, ikantakaa-karo
Pawa awishi-motairi ikimaatsi-waita-kari. Imaapiro-takiniri ishikyaaji-niri
tzimimo-tairi-ni Job, anaanakiro oshiki-pirotzi okaratzi tzimimo-witariri
owakiraini. ¹¹ Ipokajiitakini iririntzi, iritsiro-payi, aajatzi ikaratzi ñiiriri
pairani. Yakyoo-jiitapajirini iwankoki. Oshiki oimosirinka-yitakiriri,
ikantziri: “¡Naamisa! Oshiki iwasinonkaa-kimi Pawa, patsipi-takaro
pikimaatsi-waita-kari.” Oshiki ipasiyi-takari ikaratzi ariitaka-riri iwankoki,
tzimatsi opakiriri kiriiki, pasini ipayitakiri ikantatipoyita ooro. ¹² Itasonka-
wintajiri Pawa yoka Job, yanaakaa-kiri tsika ikantawita owakiraini.
Oshiki-piro-tanaji ipirayitari.^g ¹³ Itzimaji 7 itomi, aajatzi mawa irisinto.

^g 42.12 Oshiki-piro-tanaji ipirayitari = 14,000 oisha, 6,000 camello, 1,000 apiti-payi buey,
1,000 morapayi.